

VENDIM

Nr.52, datë 29.1.2004

PËR PROCEDURËN E DHËNIES SË PËRDORIMIT CIVIL TË LËNDËVE PLASËSE

Në mbështetje të nenit 100 të Kushtetutës dhe të pikës 1 të nenit 9 të ligjit nr.9126, datë 29.7.2003 "Për përdorimin civil të lëndëve plasëse në Republikën e Shqipërisë", me propozimin e Ministrit të Industrisë dhe të Energjetikës, Këshilli i Ministrave

VENDOSI:

1. Leja e përdorimit civil të lëndëve plasëse nga personat fizikë e juridikë, privatë ose publikë, vendas ose të huaj, jepet nga Ministria e Industrisë dhe e Energjetikës.
2. Leja e përdorimit civil të lëndëve plasëse jepet për subjektet e licencuara nga institucionet përkatëse në fushat minerare, gjeologjike, të hidrokarbureve dhe të ndërtimit, të cilat, për realizimin e veprimtarisë së tyre, kanë domosdoshmëri përdorimin e lëndëve plasëse.
3. Subjekti i interesuar, që kërkon të pajiset me leje për përdorimin civil të lëndëve plasëse duhet të plotësojë këto kritere dhe kushte:
 - Të jetë regjistruar në gjykatë si person juridik ose fizik;
 - Të ketë vërtetim nga organi i pushtetit vendor të zonës ku do të përdoren lëndët plasëse, se në atë zonë ku do të ushtrohet veprimtaria me lëndë plasëse nuk ka objekte, që rrezikohen nga përdorimi i tyre;
 - Të ketë lejen për ushtrimin e veprimtarisë, sipas pikës 2 të këtij vendimi;
 - Të ketë hartën topografike të zonës në shkallën 1:25000 dhe planimetrinë e zhvillimit të punimeve, me koordinatat e objektit ku do të përdoren lëndët plasëse;
 - Të ketë të përcaktuara llojin, sasinë dhe karakteristikat fiziko-kimike të lëndëve plasëse;
 - Të ketë llogaritjen e zonës së rrezikshme dhe pasaportën teknike të punës me lëndët plasëse;
 - Të sigurojë masat e sigurisë në punë, në përputhje me rregulloren e teknikës së sigurimit për punë me lëndët plasëse;
 - Të ketë miratimin për depon e lëndëve plasëse nga komisariati i policisë, që mbulon territorin ku kërkohet leja ose kontrata me një subjekt që zotëron depo të miratuar nga ky komisariat;
 - Të ketë kontratën e punës me drejtuesin teknik, inxhinier ose teknik miniere, inxhinier gjeolog, inxhinier ndërtimi, si dhe një fotokopje të noterizuar të diplomës;
 - Të ketë kontratën e punës me zjarrmëtarin dhe fotokopjen e noterizuar të dëshmisë së zjarrmëtarit;
 - Të ketë vërtetimin e regjistrimit të subjektit në RISHM (reparti i inspektim-shpëtim miniera);
 - Të ketë programin vjetor të kualifikimit të punonjësve, që merren me kryerjen e punimeve me lëndët plasëse.
4. Subjektet, për t'u pajisur me leje sipas këtij vendimi, duhet të paraqesin kërkesën me shkrim ku të shënohen:
 - emri, mbiemri i kërkuesit dhe akti ligjor i përfaqësimit si person juridik ose fizik;

- adresa e saktë e personit juridik ose fizik (tel/fax, celular);
 - veprimtaria që do të kryejë personi fizik ose juridik me lëndët plasëse.
5. Leja e përdorimit civil të lëndëve plasëse jepet brenda 30 ditëve nga data e aplikimit me shkrim të kërkuarit. Kur nuk plotësohen të gjitha kërkesat e pikës 3 të këtij vendimi, kërkesa refuzohet me shkrim.
6. Afati i lejes për përdorim civil të lëndëve plasëse është i njëjtë me afatin e licencës për ushtrimin e veprimtarisë në fushat e përcaktuara në pikën 2 të këtij vendimi dhe kur nuk ka sanksione për heqjen e lejes ripërtërihet së bashku me përtëritjen e licencës për ushtrimin e veprimtarisë.
7. Leja hiqet në rastet kur:
- subjekti, gjatë përdorimit civil të lëndëve plasëse, nuk plotëson rregullat teknike të përdorimit dhe rrezikon jetën e njerëzve, të kafshëve ose vlerave materiale;
 - subjekti kryen vepra penale, që lidhet me ushtrimin e veprimtarisë së përdorimit të lëndëve plasëse.
8. Marrësi i lejes së përdorimit civil të lëndëve plasëse është i detyruar të kryejë punime brenda objektit për të cilin i jepet leja. Leja e dhënë nuk mund t'u transferohet personave të tjerë.
9. Personat e pajisur me leje të përdorimit civil të lëndëve plasëse janë të detyruar të zbatojnë rregullat dhe masat teknike, të miratuara në rregulloren përkatëse.
10. Kontrolli i përdorimit civil të lëndëve plasëse bëhet nga reparti i inspektim-shpëtim miniera (RISHM) dhe organet e specializuara shtetërore, të parashikuara me ligj.
11. Ngarkohet Ministria e Industrisë dhe e Energjetikës për zbatimin e këtij vendimi. Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano